

Кеден одағы мен Біртұтас экономикалық кеңістікті қалыптастыруды құқықтық қамтамасыз ету туралы келісімді бекіту туралы

Қазақстан Республикасының 2001 жылғы 22 маусымдағы N 214-ІІ Заңы.

Р Қ А О - н ы ң е с к е р т п е с і !

Келісім қолданысын тоқтатты - ҚР 24.12.2014 N 266-V Заңымен.

Мәскеуде 1999 жылғы 26 қазанда жасалған Кеден одағы мен Біртұтас экономикалық кеңістікті қалыптастыруды құқықтық қамтамасыз ету туралы келісім бекітілсін.

Қазақстан Республикасының

Президенті

Кеден одағы мен Біртұтас экономикалық кеңістікті қалыптастыруды құқықтық қамтамасыз ету туралы Келісім

Бұдан әрі Тараптар деп аталатын Беларусь Республикасы, Қазақстан Республикасы, Қырғыз Республикасы, Ресей Федерациясы және Тәжікстан Республикасы,

Экономикалық және гуманитарлық салалардағы интеграцияны тереңдету туралы 1996 жылғы 29 наурыздағы Шарттың және Кеден одағы мен біртұтас экономикалық кеңістік туралы 1999 жылғы 26 ақпандағы Шарттың ережелерін жүзеге асыруды құқықтық қамтамасыз етуді мақсат тұта отырып,

интеграциялық өзара іс-қимылдың құқықтық негізін нығайтуға Ерік білдіріп және соған бекем бел буып,

Тараптардың заң шығарушы және атқарушы мемлекеттік органдары арасындағы ынтымақтастықты дамытуға тілек білдіре отырып,

интеграциялық өзара іс-қимылдың құқықтық негіздерін жетілдіру мақсатында ұлттық заңдарды үйлестіру (жақындастыру және біріздендіру) қажеттігін тани отырып, төмендегілер туралы келісті:

I Бөлім. Жалпы ережелер

1-бап

Тараптар, Тараптардың заңдарын үйлестіру;

Кеден одағы шеңберінде қол қойылған халықаралық шарттардың күшіне енуі үшін қажетті мемлекетішілік рәсімдерді орындау туралы ұсыныстарды енгізудің мерзімдерін келісу;

құқықтық ақпарат алмасуды ұйымдастыру;

осы Келісімде және Тараптар арасындағы басқа да шарттарда көзделген құқықтық қамтамасыз етудің басқа да аспектілерін ұйымдастыру арқылы құқықтық қатынастарды реттеудің біркелкі (біріздендірілген) тәртібін белгілейді.

2-бап

Тараптар мазмұны осы Келісімде белгіленетін өздерінің құқықтық жүйелерінің іс-қимылын және Тараптардың заң шығарушы және атқарушы мемлекеттік органдарының ынтымақтастығын жүзеге асыру үшін қажетті ұйымдық және құқықтық алғышарттар жасайды.

II БӨЛІМ. Ұлттық заңдарды үйлестіру

3-бап

Тараптар, халықаралық құқықтың жалпы жұрт таныған принциптеріне басымдық беруді тани отырып:

осы Келісімнің ережелеріне және Мемлекетаралық Кеңестің 1999 жылғы 26 қазандағы N 52 шешімімен бекітілген ұлттық заңдары мен өзге де нормативтік құқықтық актілерді үйлестірудің бағдарламасына сүйене отырып, ұлттық құқықтық жүйелердің ерекшеліктерін негізге алып,

ұлттық заңдарды үйлестіру (жақындастыру, біріздендіру) жөніндегі жұмыста заң шығарушы және атқарушы органдардың өзара іс-қимылы мен ынтымақтастығын қамтамасыз етеді.

4-бап

1. Тараптардың заң шығарушы және мемлекеттік атқарушы органдары:

а) ұлттық заң жобалары жоспарларын және заңға тәуелді актілерді әзірлеу мен қабылдау жоспарларын үйлестіруді;

- Үкімет басшыларының кеңесі мен Мемлекетаралық Кеңес ұсынатын үйлестірілген заңдар мен заңға тәуелді актілерді бір мезгілде күшіне енгізуді;

- жасасылған халықаралық шарттардың ережелерінің негізінде ұлттық заңдарға өзгерістер мен толықтырулар (түзетулер) енгізуді қоса алғанда келісілген заң шығармашылығы мен норма шығармашылығы саясатын жүргізу;

б) Парламентаралық Комитет қабылдайтын үлгі заң актілерін заң шығармашылығында пайдалану;

в) заңдардың жай-күйі туралы өзара құлақтандыру, заңдардың, статистикалық және басқа да әлеуметтік-экономикалық ақпараттың интеграцияланған негізін құру арқылы

ұлттық заңдар мен өзге де нормативтік-құқықтық актілерді үйлестіреді (жақындастырады, біріздендіреді).

2. Тараптардың ұлттық заңдарын үйлестіру жөніндегі ұйымдық, құқықтық және әдістемелік жұмысты үйлестіру Парламентаралық Комитет пен Интеграциялық Комитетке жүктеледі.

5-бап

1. Тараптар ұлттық заңдардың төмендегідей салаларында үйлестіруді (жақындастыруды, біріздендіруді) жүргізетін болады:

азаматтық заңдар;

валюталық реттеу мен валюталық бақылау туралы заңдар;

сыртқы экономикалық қызмет туралы заңдар;

көлік қызметі туралы заңдар;

салық заңдары;

бюджеттік реттеу саласындағы заңдар;

кеден заңдары;

экспорттық бақылау туралы заңдар;

кәсіпкерлік қызмет туралы заңдар;

тауарлар, көрсетілетін қызметтер, капитал және жұмыс күші рыногы туралы заңдар;

аграрлық сала туралы заңдар;

білім туралы заңдар;

еңбек және еңбекті қорғау туралы заңдар;

ғылыми технологиялар туралы заңдар;

ақпараттық алмасу мен бұқаралық ақпарат құралдарын пайдалану саласындағы заңдар;

инвестициялар және осы саладағы өзара іс-қимыл туралы заңдар;

ұлттық заңдардың басқа да салалары.

2. Заңдардың үйлестірілуіне тиісті салаларының басымдығын, ұлттық заңдар мен өзге де нормативтік құқықтық актілердің тізбелерін, сондай-ақ құқықтық реттеудің проблемалық мәселелерін шешудің жолдарын Тараптардың келісімі бойынша интеграцияны басқару органдары белгілейді.

6-бап

1. Тараптар Үкімет басшылары кеңесінің және Мемлекетаралық Кеңестің жасасқан халықаралық шарттары мен шешімдерінің ұлттық заңдарға сәйкестігіне салыстырмалы-құқықтық талдауды бірлесіп жүргізуді қамтамасыз етеді.

2. Тараптармен келісілгеннен кейін ұлттық заңдарға салыстырмалы-құқықтық талдау жүргізудің нәтижелері интеграцияны басқару органдарының қарауына енгізіледі , содан кейін оларды үйлестіру жөнінде тиісті ұсыныстар қабылданады.

7-бап

Тараптардың ұлттық заңдарының нормалары мен интеграцияны басқару органдары жасасқан халықаралық шарттар мен шешімдердің ережелері арасында өзара тиімді мүдделерді жүзеге асыруға теріс ықпал етуі мүмкін сәйкессіздік туындаған жағдайда, Тараптар ұлттық заңдарды үйлестіру (жақындастыру, біріздендіру) не шешімдердің мазмұнын өзгерту арқылы мұндай сәйкессіздікті жою мақсатында консультациялар мен келіссөздер жүргізеді.

8-бап

Тараптардың парламенттері мен үкіметтері Парламентаралық Комитетпен және Интеграциялық Комитетпен бірлесіп, өз құзыретіне сәйкес:

а) өзінің барлық бөліктерінде міндетті болып табылатын және Тараптардың ұлттық заңдарына айналдыру арқылы тікелей қолдануға жататын бірыңғай ережелер белгілейтін Мемлекетаралық Кеңестің шешімдерін;

б) құқықтық реттеудің келісілген бастамасы бар, Мемлекетаралық Кеңес бекітетін және тиісті мемлекетішілік рәсімдер орындалғаннан кейін ұлттық құқықтық жүйелерге енгізілетін құқық салалары бойынша заңдардың негіздерін;

в) Тараптардың нысанды таңдау және іс-қимыл әдісінің еркіндігі сақталған жағдайда күтілетін нәтиже бөлігінде Мемлекетаралық Кеңестің тиісті қарарын қабылдағаннан кейінгі міндетті заң жобалық және норма шығармашылық ұсыныстарды ;

г) Кеден одағы мен Біртұтас экономикалық кеңістік туралы 1999 жылғы 26 ақпандағы Шарттың шеңберінде құқықтық қатынастардың белгілі бір салаларын реттейтін үлгі заң актілерін;

д) интеграцияны басқару органдарының Тараптардың ұлттық заңдарын үйлестіру (жақындастыру, біріздендіру) жөніндегі басқа да ұсыныстар мен кеңестерді енгізуді қоса алғанда, ұлттық заңдарды үйлестіру (жақындастыру, біріздендіру) жөнінде шаралар қабылдайды.

9-бап

1. Ұлттық заңдарды үйлестіру жөніндегі шараларды қабылдау туралы мәселелерді шешу, олардың мазмұны мен қолданудың дәйектілігі, сондай-ақ жақындастыруға, біріздендіруге тиісті Тараптардың заңдары мен өзге де нормативтік құқықтық актілердің тізбесі Мемлекетаралық Кеңестің құзыретіне жатады.

2. Мемлекетаралық Кеңес қабылдайтын ұлттық заңдарды үйлестіру мәселелері жөніндегі шешімдер, қарарлар және ұсыныстар, сондай-ақ Парламентаралық Комитет қабылдайтын үлгі заң актілері Тараптардың тиісті органдарына:

осы Келісімнің 8-бабының а) және б) тармақтарында көзделген жағдайларда қажетті мемлекетішілік рәсімдерді орындау үшін,

шешімдердің ережелерін ұлттық заңдарға және өзге де нормативтік құқықтық актілерге енгізу үшін,

үлгі заңдарының негізінде ұлттық заң актілерін әзірлеу үшін,

Мемлекетаралық Кеңестің тиісті шешімдерінің негізінде ұлттық заңдарды және өзге де нормативтік құқықтық актілерді талдап жасау және қабылдау үшін,

шешімдердің ережелерін немесе үлгі заңының нормаларын ескере отырып, ұлттық заңдарға және өзге де нормативтік құқықтық актілерге өзгерістер мен толықтырулар енгізу үшін,

Кеден одағы шеңберінде жасалған халықаралық шарттарға және өзінің құзыреті шегінде интеграцияны басқару органдары қабылдайтын шешімдерге қайшы келетін заң актілерін алып тастау үшін жіберіледі.

10-бап

1. Осы Келісімнің 8-бабындағы а), в), д) тармақтарында көзделген Тараптардың ұлттық заңдарын үйлестіру жөніндегі шараларды қабылдау туралы ұсыныстарды Үкімет басшыларының кеңесі Интеграциялық Комитет Мемлекетаралық Кеңеске мақұлдағаннан кейін, ал б) тармағы бойынша Парламентаралық Комитетпен кеңескеннен кейін енгізеді.

2. Тараптардың ұлттық заңдарын үйлестіру жөніндегі шаралар қабылдау туралы ұсыныстар қажет болған жағдайда алдын ала ұлттық заңдарды үйлестіру жөніндегі Үйлестіру кеңесінің отырыстарында талқыланады, ал Парламентаралық Комитеттің және Интеграциялық Комитеттің консультациялары Тараптардың заң шығарушы және атқарушы органдары өкілдерінің қатысуымен өткізіледі.

III БӨЛІМ. Қол қойылған халықаралық шарттардың күшіне енуі үшін қажетті мемлекетішілік рәсімдерді орындау туралы ұсыныстарды енгізудің мерзімдерін үйлестіру

11-бап

Тараптар Кеден одағы шеңберінде қол қойылған халықаралық шарттардың күшіне енуі үшін қажетті мемлекетішілік рәсімдерді орындау туралы ұсыныстарды енгізудің мерзімдерін үйлестіруге келісті.

12-бап

Тараптар Кеден одағы шеңберінде қол қойылған халықаралық шарттар бойынша мемлекетішілік рәсімдерді орындаудың үйлестірілген мерзімдерін сақтау туралы Интеграциялық Комитетке хабарлауға уағдаласты.

IV БӨЛІМ. Құқықтық ақпарат алмасу

13-бап

1. Интеграциялық өзара іс-қимылды ақпараттық қамтамасыз ету, ұлттық заңдарды үйлестіру үшін ақпараттық негіз құру мақсатында Тараптар жан-жақты ақпарат алмасу қажеттігін таниды.

2. Тараптар ұлттық ақпараттық ресурстарды пайдалана отырып, Интеграциялық Комитетте электрондық және қағаз беттерінде ұлттық заңдар мен өзге де нормативтік құқықтық актілер эталондық деректер банкінің көшірмелерін қоса алғанда, заңдардың, статистикалық және басқа да әлеуметтік экономикалық ақпараттың интеграцияланған базасын құруға және оны тұрақты түрде жаңғыртып отыруды жүзеге асыруға келісті.

14-бап

Тараптардың мемлекеттік органдарына ұлттық ақпараттық ресурстарды пайдалана отырып заң шығарудың интеграцияланған базасына статистикалық және басқа да әлеуметтік экономикалық ақпаратты қосу жолымен ақпараттық алмасуды жүзеге асыру мүмкіндігі беріледі.

V БӨЛІМ. Қорытынды ережелер

15-бап

Осы Келісім бекітілуге жатады және депозитарий деп танылатын Интеграциялық Комитетке 1999 жылғы 26 ақпандағы Кеден одағы және Біртұтас экономикалық кеңістік туралы Шарттың бекіту грамотасы тапсырылған және Тараптар бекіткен күннен бастап күшіне енеді.

16-бап

Осы Келісім 1999 жылғы 26 ақпандағы Кеден одағы мен Біртұтас экономикалық кеңістік туралы шарттың қатысушылары болып табылатын және осы Келісімнен туындайтын міндеттемелерді толық көлемде өзіне қабылдайтын және депозитарий арқылы Мемлекетаралық Кеңеске тиісті өтініш жіберген басқа да мемлекеттердің қосылуы үшін ашық. Келісімге үшінші бір мемлекеттің қосылу шарттары Мемлекетаралық Кеңестің тиісті шешімімен анықталады.

17-бап

Осы Келісімді түсіндіру және орындау кезінде дау-дамай туындаса, олар Тараптар арасындағы келіссөздер немесе консультациялар арқылы шешілетін болады.

18-бап

Келісім бес жыл бойы қолданыста болады және егер Тараптардың бірде-бірі осы Келісімнің қолданылу мерзімі аяқталғанға дейін кем дегенде он екі ай бұрын оның қолданысын тоқтату ниеті туралы мәлімдемесе, келесі бес жылдық кезеңдерге өздігінен ұзартылады.

Тараптардың әрқайсысы кем дегенде он екі ай бұрын бұл туралы депозитарийге жазбаша хабарлау арқылы осы Келісімнен шығуға құқылы.

Мәскеу қаласында 1999 жылғы 26 қазанда беларусь, қазақ, қырғыз, орыс және тәжік тілдерінде бір-бір данадан жасалды және де барлық мәтіндердің күші бірдей. Осы Келісімнің мәтіні бойынша Тараптардың келіспеушілігі туындаған жағдайда Тараптар орыс тіліндегі мәтінді пайдаланатын болады.

Түпнұсқа дана Интеграциялық Комитетте сақталады, ол осы Келісімге қол қойған әрбір мемлекетке түпнұсқа дананың куәландырылған көшірмесін жібереді.

Беларусь

Қазақстан Қырғыз Ресей
Тәжікстан

Республикасы Республикасы Республикасы Федерациясы
Республикасы

үшін

үшін үшін үшін үшін

© 2012. Қазақстан Республикасы Әділет министрлігінің «Қазақстан Республикасының Заңнама және құқықтық ақпарат институты» ШЖҚ РМК